

禮記子思子言鄭注補正

禮記子思子言鄭注補正卷二

順德簡朝亮述

表記

謹案表。謂立以爲則者也。經曰。仁者。天下之表也。君子之道。統於仁。故名之曰表記。此所記非一時之言。蓋類而記之也。其每類發端。凡稱子言之者八。而不皆稱子曰焉。別乎論語而變文也。說詳坊記。

釋曰。孔疏引鄭目錄云。名曰表記者。以其記君子之德。見於儀表也。是矣。然表之爲言。經有其文。宜特出焉。孔疏謂經稱子言之者。凡有八所。皇氏云。皆發端起義。記者詳之。故稱子言之。若於子言之下。更廣開其事。或曲說其理。則

直稱子曰。此疏從皇侃說也。惟子曰之稱。記者豈不詳之邪。是未察其以論語故而別之也。皇如鄭說以爲孔子言之。而不知此乃子思子也。

子言之。歸乎。君子隱而顯。不矜而莊。不厲而威。不言而信。

鄭氏曰。此孔子行應聘。諸侯莫能用己。心厭倦之辭也。矜。

謂自尊大也。厲。謂嚴顏色。

己音紀

謹案子者。子思弟子尊子思之稱也。古稱師曰子。歸乎者。子思居他國而思歸隱也。孟子言子思居於衛矣。史記亦言其嘗困於宋焉。今不知其將自何國歸也。身雖隱而顯者。君子之德化也。孟子所以言古之人不得志脩身見於世也。矜。矜持也。論語曰。君子矜而不爭。又曰。子溫而厲。威。

而不猛。又曰。言而有信。蓋矜而莊。厲而威。言而信者。君子德脩在己也。其不矜而莊。不厲而威。不言而信者。君子德化及人也。中庸曰。君子不動而敬。不言而信。蓋德化則然矣。其動而敬。猶其言而信。蓋德脩所自來也。荀子曰。君子無爵而貴。無祿而富。不言而信。不怒而威。故曰。君子隱而顯。微而明。詩曰。鶴鳴于九皋。聲聞于天。此之謂也。荀子於表記有會焉。見賢遍反。聞去聲。

釋曰。鄭注以子言之者爲孔子之辭。今以坊記例之。知不然矣。說文云。矜。矛柄。蓋矛柄則有矜持之義焉。鄭注言自尊大者。以爲矜誇也。斯失之。且如鄭說。則三句之文。非一例也。引荀子者。儒效篇文。詩鶴鳴。毛傳云。皋。澤也。言身隱

而名著也。天高遠也。蓋毛詩由荀子傳之。韓詩說云。九皋九折之澤。亦古義也。

子曰。君子不失足於人。不失色於人。不失口於人。是故君子貌足畏也。色足懾也。言足信也。甫刑曰。敬忌而罔有擇言在躬。大

旦反

鄭氏曰。失謂失其容止之節也。玉藻曰。足容重。色容莊。口容止。甫刑書篇名。忌之言戒也。言已外敬而心戒慎。則無有可擇之言加於身也。

謹案甫刑尚書作呂刑。蓋呂後爲甫也。孝經亦引作甫刑。敬者由內而及外也。敬則有所戒忌矣。書康誥曰。惟文王之敬忌。若此也。凡貌色及言皆必敬忌焉。今引甫刑而惟

於言見之。則貌色可知也。周無也。擇言者可擇之過言也。
孝經曰。口無擇言。躬尚書作身。蓋義通也。

釋曰。周語稱四嶽之後者。則曰申呂。而詩崧高云。維嶽降
神。生甫及申。詩在周宣王時也。此呂後爲甫明矣。鄭注言
外敬者。於義未悉也。孔疏惟以敬忌屬貌色焉。偏矣。呂氏
大臨云。曾子稱君子所貴乎道者三。動容貌。正顏色。出辭
氣。此三事皆有所貴之道也。今表記義同。罔無釋言文。

子曰。裼襲之不相因也。欲民之母相瀆也。

裼音惕。襲音習。瀆徒谷反。

鄭氏曰。不相因者。以其或以裼爲敬。或以襲爲敬。禮盛者
以襲爲敬。執玉龜之屬也。禮不盛者以裼爲敬。受享是也。
謹案禮說曰。裼者。披上禮服左袒而出裼衣也。襲者。上禮

服掩裼衣也。玉藻曰。裘之裼也。見美也。服之襲也。充美也。古禮有然。今禮雖不同。而隨事易衣。亦敬之不相因也。與

祖通見
賢通反

釋曰。裼襲詳論語集注述疏鄉黨篇。充美。謂充積其美於中而不見也。鄭言受享者。據聘禮言之。論語所謂享禮也。

子曰。祭極敬。不繼之以樂。朝極辨。不繼之以倦。

樂音落
朝音潮

鄭氏曰。極猶盡也。辨分別政事也。祭義曰。祭之日。樂與哀半。饗之必樂。已至必哀。

已音以

謹案詩楚茨言祭畢者曰。備言燕私。毛傳曰。燕而盡其私恩。尚書大傳言燕私者曰。飲而不醉。是不親也。醉而不出。是不敬也。明不繼之以樂也。論語稱孔子在朝廷者曰。便

便言爾雅釋訓曰。便便辯也。辯與辯通。書無逸稱文王者。

曰。自朝至于日中。昃不遑暇食。明不繼之以倦也。反便婢

縣反。自朝之朝如字。音招。昃音仄。

釋曰。鄭引禮祭義者。其上文云。樂以迎來。哀以送往。蓋神來迎之則樂。故曰饗之必樂。神往送之則哀。故曰已至必哀。其哀在終也。葉氏夢得云。此不繼之以樂也。引尚書大傳者。見詩湛露疏。

子曰。君子慎以辟禍。篤以不揜。恭以遠恥。辟與避通。揜音掩。遠去聲。

鄭氏曰。篤厚也。揜猶困迫也。

謹案。曾子曰。禍之所由生。自熒熒也。是故君子夙絕之。蓋君子慎而先辟矣。禮說稱易曰。困剛揜也。君子篤厚則無。

困迫焉。孟子曰：恭者不侮人。馬氏曰：不侮人則人不侮己。故恭以遠恥也。熾息廉反

釋曰：引曾子者，大戴禮立事篇文。說文云：熾，銳細也。釋詁云：夙，早也。引易者，困象傳文。此以申鄭義也。蓋言困揜，則與經言禍言恥者一例也。篤，厚。釋詁文。或曰：大學言小人者，則云揜其不善。今言君子篤實以不揜也，然與上下文不一例矣。宋馬氏晞孟說釋遠恥者，今采焉。

子曰：君子莊敬日強，安肆日偷。君子不以一日使其躬儻焉如不終日。儻在繼反

鄭氏曰：肆，猶放恣也。偷，苟且也。儻焉，可輕賤之貌。如不終日，言人而無禮，死無時。

謹案大戴禮稱丹書曰敬勝怠者強怠勝敬者亡蓋其日
可見焉左傳稱穆叔曰趙孟將死矣其語偷又稱趙孟曰
吾儕偷食朝不謀夕何其長也蓋日偷者則如不終日矣
君子不以一日使其身有此也則自強不息也

儕仕皆反

釋曰引大戴禮者武王踐阼篇文昔帝顓頊之道在丹書
師尚父爲武王言之也別本強作吉亡作滅蓋異文也引
左傳者襄三十一年及昭元年文此以申鄭義也曲禮鄭
注云儕猶暫也蓋暫焉而已是可輕賤焉自強不息易乾
象傳文

子曰齊戒以事鬼神擇日月以見君恐民之不敬也

齊側皆反見如字

鄭氏曰擇日月以見君謂臣在邑竟者

竟古通境

謹案祭統曰。齊者。精明之至也。坊記曰。七日戒。三日齊。蓋齊則必戒矣。禮說謂若不御。不樂。不弔。不飲酒。不如葷。是也。周官膳夫曰。王日一舉。王齊日三舉。禮說謂殺牲盛饌曰舉。論語所以稱齊必變食也。異乎彼家茹素之齊矣。

樂音

岳茹音汝
葷音薰

釋曰。不御。不處內寢也。葷者。氣辛而不清。若蔥薤之屬也。孔疏云。朝臣每日朝君。何擇日月。故知臣在邑竟者。是也。蓋初仕亦該之矣。釋文。見賢遍反。今讀如字。尤易明也。古義原不以四聲異也。

子曰。狎侮死焉而不畏也。

狎下甲反

鄭氏曰。怵於無敬心也。

怵時世反

謹案陳靈公與孔寧儀行父通於夏徵舒之母所謂夏姬也。皆衷其袒服以戲于朝。泄冶諫。公曰。吾能改矣。公告二子。遂殺泄冶。既而飲酒于夏氏。公謂行父曰。徵舒似汝。對曰。亦似君。徵舒病之。公出自其廐射而殺之。二子奔楚。若此者。諫而不改。所謂狎侮死焉而不畏也。父音甫。初音日。泄息列反。治音野。廐居又反。

釋曰。禮說怙猶狃也。夏姬事見左傳宣九年及十年。曲禮云。不侵侮。不好狎。今表記言狎侮而以死焉。極其情。則怙矣。好讀去聲。

子曰。無辭不相接也。無禮不相見也。欲民之毋相褻也。易曰。初筮告。再三瀆。瀆則不告。褻息列反。三如字。告音谷。

鄭氏曰。辭所以通情也。禮謂贊也。春秋傳曰。古者諸侯有朝聘之事。號辭必稱先君以相接也。瀆之言褻也。

謹案易蒙彖辭。此師告童蒙。宜如初筮之敬而不褻瀆也。

彖吐
玩反

釋曰。引春秋傳者。莊四年公羊傳文。此約其文而引焉。行禮之辭。非一端也。鄭舉隅云爾。

子言之。仁者天下之表也。義者天下之制也。報者天下之利也。鄭氏曰。報謂禮也。禮尚往來。

謹案上文子言之者。言敬也。此子言之者。言仁也。禮說曰。未有不敬而能仁者也。此言之序也。禮儒行曰。敬愼者仁之地也。論語曰。一日克己復禮。天下歸仁焉。蓋天下之表。

也。行仁而宜之，則爲義。施仁而重之，則爲報。儒行讀行去聲

釋曰：鄭注宜有申焉。韓子原道云：博愛之謂仁，行而宜之之謂義。蓋義以制宜也。言仁之報者，詳下文。

子曰：以德報德，則民有所勸；以怨報怨，則民有所懲。詩曰：無言不讎。無德不報。大甲曰：民非后，無能胥以寧；后非民，無以辟四

方。大音泰，辟音壁。

鄭氏曰：懲，謂創艾。讎，猶答也。大甲，湯孫也。書以名篇。胥，相

也。民非君，不能以相安。創初亮反，又平聲。

謹案論語曰：以德報德，今此義同。呂刑曰：皇帝哀矜庶戮之不辜，報虐以威，遏絕苗民，無世在下。言以絕世之威報苗民之虐也。蓋以怨報怨矣。此異於論語稱以直報怨者。

禮說謂論語以人之相與言。此以君之治民言也。且以怨報怨。亦直在其中矣。詩大雅抑篇。后君也。胥猶詩載胥及溺之胥。相也。以古通與。民相與也。寧安也。言民非君。無能相與安也。無以者。無與也。論語曰。百姓不足。君孰與足。言無與也。辟亦君也。言君非民。無與君四方也。蓋君民相報也。辜音姑

釋曰。陳氏澹於以怨報怨者疑之。以其異於論語也。蓋未辯之矣。釋詁云。讎妃匹也。又云。妃對也。妃與配通。則讎亦對也。對答義同。鄭注云。民非君。不能以相安。此言胥以者倒之。以之爲言。於義未析也。后君。胥相。寧安。皆釋詁文。詩柔柔云。載胥及溺。言民相及也。詩江有汜。鄭箋云。以猶與

也。蓋古通也。經引大甲者。今僞大甲竄之而異文爾。釋文不知其僞焉。禮說云。創者痛也。艾文從父。釋詁云。父治也。艾以痛治疾也。今日痛懲。又曰懲治。其義也。

子曰。以德報怨。則寬身之仁也。以怨報德。則削戮之民也。

鄭氏曰。寬猶愛也。愛身以息怨。非禮之正也。仁亦當作民聲之誤。

謹案或曰。此仁非誤文也。經下文曰。與仁同過。然後其仁可知也。故仁者之過。易辭也。今日寬身之仁也。此寬身不危急。仁者之過也。豈嘉其以德報怨乎。此韓文原道所謂彼以煦煦爲仁也。易以智反。煦香句反。

釋曰。如鄭說。經當曰寬身之民也。其稱寬身者。論語朱注

所謂出於有意之私也。

子曰。無欲而好仁者。無畏而惡不仁者。天下一人而已矣。是故君子議道自己。而置法以民。好去聲惡鳥路反

鄭氏曰。一人而已。喻少也。自己。自盡己所能行。

謹案自由也。議仁之道必由己者。辯善惡而好惡焉。君子當以天下一人自盡者責己也。論語曰。爲仁由己。而由人乎哉。置立也。立賞罰之法必以民者。因勸戒而好惡焉。君子不以一人所能者概天下之民也。故經下文曰。率法而強之。資仁者也。強上聲

釋曰。此當上下文相貫而言。孔疏於義未融也。釋詁云。由。自也。則自亦由也。漢書注云。置立也。

子曰。仁有三。與仁同功而異情。與仁同功。其仁未可知也。與仁同過。然後其仁可知也。仁者安仁。知者利仁。畏罪者強仁。知者

音智強
上聲

鄭氏曰。三。謂安仁也。利仁也。強仁也。利仁。強仁。功雖與安仁者同。本情則異。功者人所貪也。過者人所避也。在過之中。非其本情者。或有悔者焉。

謹案禮說曰。與仁同過。其仁可知。論語所謂觀過知仁也。其說明矣。仁者安於仁而安行之。知者利於仁而利行之。畏罪者強於仁而強行之。皆仁也。此經所以言仁有三也。論語曰。仁者安仁。知者利仁。中庸曰。或安而行之。或利而行之。或勉強而行之。及其成功一也。

釋曰。易繫辭傳云。安土敦乎仁。言安仁也。孔疏云。知者貪利而行仁。有利則行。無利則止。非本情也。是何其說之妄乎。孟子云。彊恕而行。求仁莫近焉。亦彊仁之說也。彊與彊通。

仁者右也。道者左也。仁者人也。道者義也。厚於仁者薄於義。親而不尊。厚於義者薄於仁。尊而不親。左音佐

鄭氏曰。右也。左也。言相須而成也。人也。謂施以人恩也。義也。謂斷以事宜也。春秋傳曰。執未有言舍之者。此其言舍之何人也。鄭氏又曰。仁義並行者也。仁多則人親之。義多則人尊之。斷丁亂反。舍上聲。

謹案。右人所用也。左讀若佐。蓋左以佐右焉。易曰。后以財

成天地之道。輔相天地之宜。以左右民。今言仁道之爲左。右也。孟子曰。仁也者。人也。合而言之。道也。今言仁者。其用無以尙之。如人之右也。道者。行仁而合佐其成。如人之左也。中庸曰。仁者人也。義者宜也。今言仁者。天地生物之心。所以愛人也。道者。行仁而宜之。所以斷義也。仁義皆天性具焉。其或厚或薄。則氣習之偏爾。

釋曰。鄭注宜有申焉。孔疏讀左如字。以爲仁恩若右手用便也。道是履行。比仁恩稍劣。故爲左也。非也。此未察乎義之道。自仁而分。亦自仁而合也。今言仁者。豈可言道劣乎。王制云。執左道以亂政。左道者。言其不便也。今言道者。豈可言道爲左乎。引易者。泰象傳文。財古通裁。引春秋傳者。

成十六年。公羊傳文。鄭所引本。與何休本略不同。孔疏云。人也是人偶。相存愛也。疏有攷矣。中庸鄭注云。人也。讀如相人偶之人。鄭据仁從二人而會意焉。傳言執者。謂有罪而執之也。

道有至。義有考。至道以王。義道以霸。考道以爲無失。

鄭氏曰。此讀當言道有至。有義。有考。字脫一有耳。有至。謂兼仁義者。有義。則無仁矣。有考。考成也。能取仁義之一成之。以不失於人。非性也。

謹案此承上文道者義也而明之。其曰道有至。義有考。則顯義道者在其間矣。蓋道者義也。自道之本義而言。卽行仁所制之宜也。今日義道。自人之取義於道而言。謂其異

乎身至於道者。惟取義於道。假義名而令天下也。義道則非行道之本義。故經不曰道有義。而惟曰道有至。明至道非義道比也。而以義道故。遂有慕義而稽考於道者。故經乃曰義有考。則經非脫文矣。易文言曰。知至至之。斯造其極而身至於道也。王者若斯矣。孟子所謂湯武身之也。書大誥言東征者曰。義爾邦君。此王者至道而行道於義也。書鴻範喜遵王之道。遵王之義者。宜然也。左傳稱狐偃言於晉侯曰。求諸侯莫如勤王。諸侯信之。且大義也。晉文公取焉。此霸者不至道而取義於道也。則義道云爾。孟子所謂五霸假之也。若夫慕霸者之義道。自恐失亡。而稽考於道也。則考道以爲無失矣。荀子稱中蘇之言曰。諸侯自爲

得師者王。得友者霸。得疑者存。蓋得師則知至道。得友則知義道。得疑則知稽疑而考道。存者不亡而無失也。若戰國策言燕昭之間郭隗而復仇存國也。中音仲。藹許偉反。燕平聲。隗五賄反。釋曰。鄭注於經未悉叶焉。引左傳者僖二十五年文。或曰。至道者至極之道也。若中庸所稱至道也。今據經以至道與考道相承。皆當爲致力之辭。至道者造其極而身至於道也。古字儀作義。周官肆師注言故書者可攷也。蓋取義而義之。則儀法之矣。亦致力之辭。書大誥以義爾邦君爲文。其例也。引荀子者堯問篇文。中藹之言者。書序所謂仲虺之誥也。蓋書逸文。成二年左傳云。四王之王也。樹德而濟同欲焉。五伯之霸也。勤而撫之。以役王命。杜注云。四王。

禹湯文武五伯夏伯昆吳商伯大彭豷韋周伯齊桓晉文是也。孟子云五霸者三王之罪人也。蓋其取義於道非身至於道也。疑者若禮言師保疑丞之疑也。故與師友並稱焉。詳尚書集注述疏。荀子王霸篇云粹而王駁而霸無一焉而亡。非猶中歸之言歟。論語云管仲相桓公霸諸侯又云如其仁如其仁。蓋霸者非有義則無仁矣。孟子云堯舜性之也。然則湯武非性也。況其他乎。孔疏申鄭者失之矣。四王之王也。下王讀去聲。

子言之。仁有數。義有長短小大。中心慤怛。愛人之仁也。率法而強之。資仁者也。詩云豐水有芑。武王豈不仕。詒厥孫謀。以燕翼子。武王烝哉。數世之仁也。國風曰我今不閱。皇恤我後。終身之

仁也。

惜七感反。怛都達反。強上聲。芑音紀。烝之承反。

鄭氏曰。資。取也。數。與長短小大互言之耳。性仁義者其數長大。取仁義者其數短小。芑。枸櫞也。仕之言事也。詒。遺也。燕安也。烝。君也。言武王豈不念天下之事。如豐水之有芑矣。乃遺其後世之子孫以善謀。以安翼其子也。君哉武王。美之也。闕。猶容也。皇。暇也。恤。憂也。言我今尙恐不能自容。何暇憂我後之人乎。

懽音計。遺于季反。

謹案行仁而宜之。則爲義。長短小大皆仁之數所制之宜也。仁由中心。天生人之性然矣。孟子曰。今人乍見孺子將入於井。皆有怵惕惻隱之心。明其性仁也。強以資仁。人之復其性焉。資仁者視所取之數爲長短小大矣。數世之仁。

長以大終身之仁短以小。詩大雅文王有聲篇毛傳曰芑草也。鄭箋謂豐水以潤澤生草也。翼助也。國風詩邶風谷風篇我今毛詩作我躬。皇古遑字。皇爲不皇猶敢爲不敢也。此語急之辭。乍查去聲恍音黜耶蒲對反

釋曰。孝經說資取也。今義同。鄭注云。取仁義者其數短小。鄭以其非性也。然孟子以堯舜爲性之。湯武爲身之。故曰。湯武反之也。蓋復其性也。孟子言反之者。則以君子行法而中言矣。由是推之。武王亦資仁者也。而經稱其數世之仁。則資仁者何非其數長大乎。所謂及其成功一也。爾雅釋木云。杞枸櫞。今鄭以釋芑非也。故鄭詩箋改從毛矣。詒遺。釋言文。燕安。詩離毛傳義同。烝君。釋詁文。鄭於此無訓。

翼焉。翼助。詩卷阿鄭箋義也。詩谷風毛傳云。閭容也。鄭今以猶言之。釋言云。惶暇也。皇與惶通。聘禮記云。辭曰。非禮也。敢。注云。言不敢。蓋語急者例同。恤憂。釋詁文。

子曰。仁之爲器重。其爲道遠。舉者莫能勝也。行者莫能致也。取數多者。仁也。夫勉於仁者。不亦難乎。是故君子以義度人。則難爲人。以人望人。則賢者可知已矣。勝平聲夫音扶度徒洛反

鄭氏曰。取數多者。言計天下之道。仁居其多。又曰。言以先王成法。擬度人。則難中也。當以時人相比方耳。擬魚起反中去聲

謹案論語辯仁者曰。爲之難。又曰。仁者先難而後獲。今言勉爲其難也。義者行仁而宜之。概以義而擬度人。則難爲賢人。惟以其人之能行。卽望其人之爲賢。則賢者有可知。

焉。論語稱周公之言曰。無求備於一人。中庸曰。君子以人治人。改而止。

釋曰。論語云。任重而道遠。斯曾子言仁以勉士矣。鄭注言時人者。於經病添文也。奚謂時人必賢者邪。曲禮云。僂人必於其倫。言僂度也。

子曰。中心安仁者。夫下一人而已矣。大雅曰。德輿如毛。民鮮克舉之。我儀圖之。維仲山甫舉之。愛莫助之。小雅曰。高山仰止。景行行止。子曰。詩之好仁如此。鄉道而行。中道而廢。忘身之老也。不知年數之不足也。俛焉日有孳孳。幾而后已。

聲俛音勉孳音茲已音以

輿音由鮮上聲行古音杭鄉去

鄭氏曰。輿。輕也。鮮。罕也。儀。匹也。圖。謀也。愛。猶惜也。言德之

輕如毛耳。人皆以爲重。罕能舉行之者。作此詩者。周宣王之
之大臣也。言我之匹謀之。仲山甫則能舉行之。美之也。惜
乎時人無能助之者。言賢者少。仰高勤行者。仁之次也。景
明也。有明行者。謂古賢聖也。廢喻力極罷頓。不能復行則
止也。俛焉勤勞之貌。斲仆也。景行鄭讀行去聲罷與疲通仆蒲北反

謹案大雅詩烝民篇。仲山甫舉之者。勉於仁也。非安仁也。
亦率法而強之也。詩所以言仲山甫古訓是式。威儀是力
也。仲山甫愛人以德。莫以舉之而助不能舉之者。明乎勉
於仁者當自勉也。小雅詩車羣篇。朱子曰。景行大道也。高
山則可仰。景行則可行。是也。蓋仰高山者。行大道以至也。
止語辭。猶之也。廢謂不行也。朱氏曰。旣鄉道而行矣。可中

道而廢乎。是以不能自己也。蓋其自勉而好仁者如此。

與

通轄

釋曰。翰。輕。釋言文。鮮。罕。儀。匹。圖。謀。釋詰文。詩釋文云。我義
毛如字。宜也。鄭作儀。匹也。詩說。我匹。猶今言我等。鄭注釋
愛者。於文未適也。詩下文云。袞職有闕。維仲山甫補之。蓋
愛君之心。於莫助之者而補過欲助之也。此其義貫詩下
文而言。特於民統言爾。今斷章取義焉。論語云。曾子曰。以
友輔仁。而又曰。堂堂乎張也。難與並爲仁矣。蓋輔者助之。
然友非自勉。則愛莫助之也。大戴禮於子張稱其仁之大
者。以其卒能自勉也。故論語云。爲仁由己。而由人乎哉。鄭
釋景行者。於經言行道之文未洽也。詩毛傳云。景大也。史

記孔子世家云。詩有之。高山仰止。景行行止。雖不能至。然心鄉往之。是其仰而欲至也。經云。鄉道而行。中道而廢。此而之爲文。上下二者相折焉。詩十月之交云。彼月而微。此日而微。又云。彼月而食。則維其常。此日而食。于何不臧。其例也。元朱氏公遷說得之。鄭注猶失也。中庸云。子曰。君子遵道而行。半途而廢。吾弗能已矣。今此義同。釋文強其兩反。一本作俛。音勉。蓋陸氏本俛焉作強焉。后古通後。

子曰。仁之難成久矣。人人失其所好。故仁者之過。易辭也。

易以智反

鄭氏曰。言仁道不成。人所由不得其志。辭猶解說也。仁者恭儉。雖有過不爲甚矣。惟聖人無過。

謹案好。卽上文好仁之好。論語曰。我未見好仁者。孔子嘆

焉。今以嘆人人之衆也。易辭者寬假之辭。謂不責以難辭也。言衆失其所好。則難成仁。故好仁而有過。是仁者之過焉。則以其難成而寬假以易辭也。經上文曰。與仁同過。然後其仁可知也。蓋不責以難辭矣。下文言有過不甚者。又明仁者之過。所以可爲易辭也。

釋曰。鄭注於經之言。故者遺之矣。隱八年公羊傳云。其言入何。難也。何注云。難辭也。公羊傳於莊八年云。還者何。善辭也。於僖二十六年云。乞師者何。卑辭也。蓋其爲文與此同。經曰。易辭也。蓋三字絕句焉。

子曰。恭近禮。儉近仁。信近情。敬讓以行此。雖有過。其不甚矣。夫恭寡過。情可信。儉易容也。以此失之者。不亦鮮乎。詩曰。溫溫恭

人維德之基。

易以智反
鮮上聲

鄭氏曰言罕以此失之。

謹案禮者仁之節也。情者仁之實也。信約信也。論語曰。恭近於禮。遠恥辱也。禮說謂此所由恭寡過歟。論語曰。節用而愛人。蓋儉近仁而易容者焉。論語曰。信近於義。言可復也。禮說謂義卽情義。近義則近情矣。言可復則情可信矣。經又變文言情於恭儉之間者。明乎恭儉必以情也。孟子曰。恭儉豈可以聲音笑貌爲哉。詩大雅抑篇。毛傳曰。溫溫寬柔也。今攷中庸曰。寬裕溫柔。足以有容也。曲禮曰。恭敬撙節。儉德由恭始也。書曰。允恭。允信也。情之信。始乎恭德也。恭始也。此所以獨引詩而申言恭也。

遠去聲
撙上聲

釋曰。允信。基始。釋詁文。孔疏云。儉則寡求。故易容疏以自容言也。惟經言愛人之仁。當如易臨象所稱容保民者。乃近之矣。孔疏釋信爲實焉。則情亦實也。豈可言實近實邪。周氏謂云。以情閒於恭儉者。恭儉以信爲主也。此察乎經之爲文矣。而釋信與孔疏同。或曰。經當作情近信。非也。夫信者。以情言也。何近之云乎。此猶不可言心近仁也。故論語云。仁遠乎哉。我欲仁。斯仁至矣。

子曰。仁之難成久矣。唯君子能之。是故君子不以其所能者病人。不以人之所不能者愧人。是故聖人之制行也。不制以己。使民有所勸勉愧恥以行其言。禮以節之。信以結之。容貌以文之。衣服以移之。朋友以極之。欲民之有壹也。小雅曰。不愧于人。不

畏于天。

制行讀行去聲。己音紀。移如字。

鄭氏曰。唯君子能之。言能成人道者少也。病人愧人。謂罪咎之。以中人爲制。則賢者勸勉。不及者愧恥。聖人之言。乃行也。移。讀如禾。汜。移之移。移。猶廣大也。極致也。壹。謂專心於善。不愧于人。不畏于天。言人有所行。當慙怖於天人也。

汜與汎通。怖。普故反。

謹案。節者。和而有節也。故禮得仁之中和矣。論語曰。知和而和。不以禮節之。亦不可行也。信實也。今人稱果實曰仁。明仁無不實焉。此信與禮對文。蓋信之全體也。經上文言情可信者。在其中矣。結者。自始至終而成也。論語曰。信以成之。容貌者。容色也。孝經所謂容止也。論語戒色取仁矣。

易之賁曰。文明以止。人文也。移如孟子言移氣移體之移。蓋服先王之法服。因以改容。是仁之表也。大學云。至善者。曰。君子無所不用其極。今於朋友之輔仁以極之也。此制行之所以多方。豈不壹歟。欲其有壹而已矣。詩序曰。鵲鳩刺不壹也。毛傳曰。執義一則用心固。小雅詩何人斯篇。引詩者欲其因畏生愧。而有用心之壹也。賁欲義反。鵲音尸。

釋曰。吳氏澄云。上言愧人。我愧之也。下言愧恥。彼自愧也。移。今讀如字。平聲。釋文。移。昌氏反。注同。或曰。禾汜移者。鄭引漢時言也。禾作水者。非。詩禾分布。必汜移之而廣大。章服加等。皆汜移之而廣大。似矣。然衰經喪服。豈謂廣大邪。壹猶一也。詩鵲鳩毛傳云。鵲鳩之養其子。朝從上下。莫從

下上平均如一。是也。曾子立孝篇云。君子壹孝壹弟。言無貳心也。莫讀若暮。下上之上。時掌反。

是故君子服其服則文。以君子之容。有其容則文。以君子之辭。遂其辭則實。以君子之德。是故君子恥服其服而無其容。恥有其容而無其辭。恥有其辭而無其德。恥有其德而無其行。是故君子衰經則有哀色。端冕則有敬色。甲冑則有不可辱之色。詩云。維鷦在梁。不濡其翼。彼其之子。不稱其服。行如字。衰七雷反。鷦田節反。冑直又反。鷦音啼。濡而朱反。彼其讀其若記。稱去聲。

鄭氏曰。遂猶成也。無其行。謂不行其德。哀敬不可辱。言色稱其服也。鷦鷦胡。污澤也。污澤善居泥水之中。在魚梁。以不污污其翼爲才。如君子以稱其服爲有德。

謹案行如論語子張問行之行。蓋行其德於人而皆可行也。易曰。君子以成德爲行。日可見之行也。經上文稱以行其言。斯卽其行見端矣。衰。斬衰。齊衰。喪禮。麻在首在要。皆曰經。端。禮服用正幅也。冕。禮冠。甲。蔽身者。冑。冒首者。色。謂其德之容。故其辭其行從可推也。詩曹風候人篇。鶉食魚之鳥。本在魚澤中。杼水者。今在魚梁而不濡其翼。不稱也。皋陶謨曰。天命有德。五服五章哉。今言其德不稱也。爲行

去聲齊音咨要與
腰通杼神與反

釋曰。經云有其德而無其行。釋文云。行下孟反。孔疏云。德在於內。行接於外。此讀行去聲。於義未析也。夫德者。德行之德也。苟無德行。豈可謂有其德乎。今讀行平聲。鄭注以

不行其德釋之。則鄭於經原讀如字也。特其說猶略爾。引
易者。乾文言。文其言以成德爲行。自治已言之也。蓋在於
內焉。其言日可見之行也。自及人言之也。蓋接於外焉。故
其下文云。行而未成。明乎君子之潛者將有其行。而非無
其行也。爾雅釋鳥云。鷦污澤。蓋卽鷦胡也。詩說。鷦領下胡
如數升囊。入小澤。羣以胡扞水而棄之。竭澤食其魚。是也。
鄭注於詩義未洽也。彼其之子。從監本。釋文。彼記本又作
己。音同。蓋異文也。詩揚之水箋云。其或作記。或作己。讀聲
相似。今亦例同。

子言之。君子之所謂義者。貴賤皆有事於天下。天子親耕。桑盛

柶音叅盛平聲
柶音巨也音暢

鄭氏曰。言無事而居位食祿。是不義而富且貴。

謹案禮祭義曰。昔者天子爲藉千畝。冕而朱紘。躬秉耒。言親耕也。左傳說。黍稷曰粢。在器曰盛。禮說。秬黑黍。一稌二米。以秬爲酒。芬芳條鬯。故曰秬鬯。是也。勤勞也。尙書說。勤勞王家。輔佐也。詩六月曰。以佐天子。蓋天子諸侯之有事。乃義所宜也。則天下貴賤皆有事焉。其義明矣。藉在亦反。紘音宏。耒

力內反。稌音孚。

釋曰。左傳說。紘冠纓從下而上者。垂之以爲飾也。周官鬯人。掌共秬鬯。大宗伯凡祀大神。享大鬼。祭大元。皆云。涖玉鬯。注云。涖。視也。共。與供通。元。與祇通。今以上帝大神言之。涖玉者。大宗伯所謂以蒼璧禮天也。涖鬯者。表記所謂天

子事上帝之秬鬯也。禮郊特牲云。器用陶匏。郊禮以匏酌焉。非如宗廟鬼享者。所謂鬱合鬯。灌以圭璋。用玉氣也。孔疏攷之未詳矣。勤勞釋詁文。釋詁云。輔備也。備猶佐也。

子曰。下之事上也。雖有底民之大德。不敢有君民之心。仁之厚也。是故君子恭儉以求役仁。信讓以求役禮。不自尚其事。不自尊其身。儉於位而寡於欲。讓於賢。卑己而尊人。小心而畏義。求以事君。得之自是。不得自是以聽天命。詩云。莫莫葛藟。施于條枚。凱弟君子。求福不回。其舜禹文王周公之謂與。有君民之大德。有事君之小心。詩云。維此文王。小心翼翼。昭事上帝。聿懷多福。厥德不回。以受方國。葛藟力水反。施以智反。枚音律。凱弟同。愷悌與平聲。聿音律。

鄭氏曰。底覆也。無君民之心。是思不出其位。役之言爲也。

求以事君者。欲成其忠臣之名也。自是以聽天命。言不易道。微祿利也。凱樂也。易也。言樂易之君子。其求福脩德。以俟之。不爲回邪之行。要之。如葛藟之延蔓於條枚。是其性也。有大德。有小心。言此德當不回也。昭明也。上帝天也。聿述懷至也。言述行上帝之德。以至於多福也。方四方也。受四方之國。謂王天下。覆浮去聲。微古堯反。樂音落。樂易之易。以智反。要平聲。謂王讀王去聲。

謹案以愛君而愛民。故曰仁之厚也。求者自求也。論語曰。君子求諸己。役者君役之也。易曰。致役乎坤。謂地爲天役。象臣爲君役焉。故易曰。地道也。臣道也。役仁。役禮者。孟子所謂小德役大德也。恭。謂行己之恭。故經以不自尚自尊。

而申言之。書無逸稱文王曰懿恭。詩絲毛傳曰。西伯仁人也。蓋仁必恭也。儉。謂在位之儉。仁者無欲。儉寡於欲。則近仁。蓋君子恭儉以求君之役仁也。信讓者。實讓不僞也。其信恭儉可互明矣。禮爲仁之節。主退讓焉。蓋君子信讓以求君之役禮也。故經總言曰。求以事君。恭儉信讓。皆小心而畏義也。白。是由是道也。詩大雅旱麓篇。毛傳曰。莫莫施貌。釋文謂藹似葛之草也。詩大雅大明篇。翼敬也。敬而又敬。故翼翼然。聿。遂也。禮說曰。惟文王不得於君。最處其變。故獨引詩以明之。

麓音鹿

釋曰。論語云。其行己也恭。其事上也敬。謂子產有君子之道焉。鄭釋役者。諸家因之。非洽也。引易者。說卦及坤文言。

文。小德役大德。此孟子言小役於大也。釋詁云。懿美也。文王爲西伯。故稱焉。釋詁。由自義同。釋詁云。愷樂也。弟易也。鄭注從之。凱與愷通。釋詁云。翼敬也。論語云。趨進翼如也。蓋翼爲敬之容也。爾雅釋訓云。翼翼恭也。恭者敬之發於外也。中庸云。爲人臣止於敬。言文王也。蓋敬該諸德焉。則仁在其中矣。釋詁云。適述也。鄭以聿通通焉。詩蟋蟀毛傳云。聿遂也。今以遂至言之。於文尤洽也。懷至。釋詁文。

子曰。先王諡以尊名。節以壹惠。恥名之浮於行也。是故君子不自大其事。不自尚其功。以求處情。過行弗率。以求處厚。彰人之善而美人之功。以求下賢。是故君子雖自卑而民敬尊之。諡音示行

去聲處上聲

鄭氏曰。謚者行之迹也。名者聲譽也。言先王論行以爲謚。以尊名者。使聲譽可得而尊信也。壹讀爲一。惠猶善也。言聲譽雖有衆多者。節以其行一大善者爲謚耳。在上曰浮。君子勤行成功。聲譽踰行。是所恥也。率循也。過行不復循行。猶不貳過。自卑而民敬尊之。言謙者所以成行立德也。謹案情猶實也。過如論語過猶不及之過。蓋過高之行。君子弗率循焉。其行惟以求處篤厚而已。禮說謂此不驚世而取名也。

釋曰。大學鄭注云。情猶實也。今義同。經言君子自卑者。統承此過行弗率而言之。鄭注未察於此焉。或曰。尊名者。謂謚之易名也。然經言名行之名。豈謂人名者乎。釋詁云。惠。

順也。順猶善也。釋言云。若順也。釋詁云。若善也。故鄭云。惠猶善也。釋詁。率。循義同。

子曰。后稷。夫下之爲烈也。豈一手一足哉。唯欲行之。浮於名也。故自謂使人。行去聲

鄭氏曰。烈業也。言后稷造稼穡。天下世以爲業。豈一手一足。喻用之者多無數也。自謂使人。亦言其謙也。避仁聖之名。云吾便習於此事之人耳。

謹案史記曰。后稷名弃。爲兒時。其遊戲。好種麻菽。及爲成人。遂好耕農。此所由自謂便習之人也。弃與桑通

釋曰。烈業。釋詁文。史記敘后稷者。與詩生民說符矣。

子言之。君子之所謂仁者。其難乎。詩云。凱弟君子。民之父母。凱

禮記子思子言鄭注補正

卷二

孝言

三

以強教之。弟以說安之。樂而毋荒。有禮而親。威莊而安。孝慈而敬。使民有父之尊。有母之親。如此而后可以爲民父母矣。非至德其孰能如此乎。

強如字平聲說音悅樂音落

鄭氏曰。有父之尊。有母之親。謂其尊親已如父母。

謹案詩大雅泂酌篇。凱樂也。弟易也。毛傳曰。樂以強教之。易以說安之。蓋由表記而釋焉。中庸稱寬柔以教。南方之強也。况君子樂以強教之乎。易曰。易則易知。簡則易從。易知則有親。易從則有功。是君子易以說安之也。毋如論語毋意之毋。猶無也。荒廢也。詩唐風曰。好樂無荒。親者不相離也。樂記曰。禮者爲異。禮勝則離。君子樂而毋荒。斯強教之矣。君子有禮而親。斯說安之矣。威者有威可畏也。易曰。

威如之吉。反身之謂也。謂家人上九剛強終吉焉。莊者君子非色莊也。論語曰。臨之以莊。經曰。君子莊敬曰強。安者其所安也。性者安。勉者亦安也。論語曰。威而不猛。恭而安。善事父母爲孝。慈則孝之愛也。內則言事父母者曰。慈以旨甘。莊子亦言事親則孝慈也。曾子曰。民之本教曰孝。彊者彊此者也。故表記此文歸本於孝焉。論語固言孝者爲仁之本也。強與彊通。於孝言敬者。明乎孝不惟愛也。孝經曰。慈愛恭敬。君子威莊而安。孝慈而敬。皆強教之也。以身教也。其教因天性而化民。皆說安之也。蓋樂以強教之。則使民有父之尊矣。易以說安之。則使民有母之親矣。一說曰。大學言君子成教者云。孝者所以事君也。弟者所以事

長也。慈者所以使衆也。表記此文以孝該弟。則稱孝慈焉。蓋慈幼也。記曰子也者親之後也。敢不敬與。此慈而敬也。

洞音迴長丁丈反與平聲

釋曰。禮疏云。使人樂仰自強。此自受教者言。何以貫詩君子之爲文邪。詩疏自教者言。是也。特未詳爾。引易簡者。易繫辭傳文。詩賓之初筵序云。幽王荒廢。則荒者廢也。襄三十一。年左傳云。有威而可畏。謂之威。故易以反身明其威矣。論語云。君子者乎。色莊者乎。君子非色莊也。論語云。察其所安。今此言安者。義同。引曾子者。大戴禮大孝篇文。教因天性。孝經說也。引記者。禮哀公問文。釋文。凱弟。本亦作愷悌。今攷毛詩作豈弟。皆異文也。

今父之親子也。親賢而下無能。母之親子也。賢則親之。無能則憐之。母親而不尊。父尊而不親。水之於民也。親而不尊。火尊而不親。土之於民也。親而不尊。天尊而不親。命之於民也。親而不尊。鬼尊而不親。

鄭氏曰。或見尊。或見親。以其嚴與恩所尚異也。命謂四時政令。所以教民勤事也。鬼謂四時祭祀。所以訓民事先也。謹案此申上文尊親之難。其言鬼不言神。異於下文者。以自民言之也。王制曰。庶人祭於寢。祭法曰。庶人無廟。死曰鬼。

釋曰。孔疏云。鬼謂鬼神。汎矣。事先坊本作事君。譌也。

子曰。夏道尊命。事鬼敬神而遠之。近人而忠焉。先祿而後威。先

賞而後罰。親而不尊。其民之傲。忤而愚。喬而野。朴而不文。殷人尊神。率民以事神。先鬼而後禮。先罰而後賞。尊而不親。其民之傲。蕩而不靜。勝而無恥。周人尊禮尚施。事鬼敬神而遠之。近人而忠焉。其賞罰用爵列。親而不尊。其民之傲。利而巧。文而不慙。賊而蔽。

遠去聲。忤傷容反。喬如字。朴普角反。施如字。

鄭氏曰。夏遠鬼神。近人。謂外宗廟內朝廷也。其民之傲。以本不困於刑罰。少詐諉也。傲。謂政敎衰失之時也。殷人先鬼後禮。謂內宗廟外朝廷也。禮者。君臣朝會。凡以摯交接相施予也。以本忤於鬼神。虛無之事。令其心放蕩無所定。困於刑罰。苟勝免而無恥也。月令曰。無作淫巧以蕩上心。周賞罰用爵列。以尊卑爲差。其民以本數交接以言辭。尊

卑多獄訟。

譏況袁反。子古通與。差楚宜反。數音朔。

謹案事鬼敬神互文也。故經下文言事神。論語曰。敬鬼神而遠之。人者對鬼神之辭。論語稱禹者曰。菲飲食而致孝乎鬼神。此夏之近人而忠焉者也。曾子曰。忠者其孝之本與。夏書曰。用命賞于祖。不用命戮于社。此尊命者之先賞而後罰也。詩曰。緇衣之宜兮。敝予又改爲兮。易曰。君子以永終知敝。蓋敝者其始則宜。其終則敝爾。敝則不能無改爲者。其勢然也。此可以明夏及殷周之道矣。言其民之敝者。明非其道之敝也。自其民失之也。董子曰。道者萬世亡弊。弊者道之失也。敝與弊通。論語言三代者。自其始所尙之宜言之。今言三代者。自其終所失之敝言之。蓋子思子

之時。世衰甚矣。此其言各有所當也。秦鈍也。喬高也。野人多自高者。朴言其質也。殷人先鬼。先罰者。若盤庚言先后降疾。又多言罰也。禮祭義曰。祀之忠也。如見親之所愛。如欲色然。其文王與此周之近人而忠焉者也。其賞罰用爵列者。周人之禮。賞則貴貴。罰有議貴也。呂氏曰。若玉藻云。凡賜君子與小人不同日。若曲禮云。刑不上大夫。若周官小司寇云。凡命夫命婦不躬坐獄訟。是也。利。如論語。小人喻於利之利。欲爵列可施也。故取巧焉。文。如論語。文莫吾猶人也之文。禮有文辭也。賊。如禮經。解易之失賊之賊。猶害也。蓋有因文爲賊害者。以遂其偏蔽之辭。漢書所以稱文毋害也。

本與之與平聲下王與同亡音無當去聲鈍音遁上時掌反

釋曰。鄭注言外宗廟者。非也。夫宗廟可言內。不可言外。非若朝廷可言內外也。鄭說於諸經無徵矣。引曾子者。大戴禮本孝篇文。引夏書者。甘誓文。引詩緇衣者。斷章之義也。引易者。歸妹象傳文。明此言做者以其終言也。引董子者。見漢書董仲舒傳。或曰。愬文從心從春。蓋心如春杵在中。然謂其鈍也。喬高。釋詁文。禮說讀喬如字。今從之。釋文。喬音驕。孔疏謂民驕野。非也。豈其類乎。說文云。諛詐也。鄭用重文。盤庚者。殷王也。商書以名篇。商改爲殷也。鄭釋禮言施予者。据周人尊禮尙施也。鄭引月令文。取心有言蕩爾。非以淫巧爲說也。祭義鄭注云。如欲色者。以時人於色厚。假以喻之。孔疏引馬昭辯王肅難鄭者。謂猶好德如好色。

也。顧氏炎武從焉。惟好德汎言之。非此例矣。大戴禮文王
官人篇。以欲色與喜色怒色連言。哀六年公羊傳。有色然
之文。今謂如所欲喜色然也。王肅說未察斯例焉。貴貴。据
禮祭義也。議貴。据周官小司寇也。宋呂氏大臨說有攷矣。
孟子云。諛辭。知其所蔽。諛者。偏也。偏蔽則害政而害事矣。
引文毋害者。見漢書蕭何傳。

子曰。夏道未瀆辭。不求備。不大望於民。民未厭其親。殷人未瀆
禮。而求備於民。周人強民。未瀆神。而賞爵刑罰窮矣。強如字平聲

鄭氏曰。未瀆辭者。謂時王不尚辭。民不褻爲也。不求備。不
大望。言其政寬。貢稅輕也。強民。言承殷難變之敝也。賞爵
刑罰窮矣。言其繁文備設。鄭讀強上聲

謹案。讀者自後世其民之敝而言也。不求備者。不求文備也。經下文所以言夏之質。不勝其文也。大望猶過望也。經上文曰。以人望人。則賢者可知已矣。此夏所以不大望於民也。殷周亦無言大望於民者焉。未厭者。謂親上之無厭也。殷道漸文。進於夏道。而求文備於民矣。經不言周求備於民者。以及周而備也。經下文曰。殷周之文。至矣。明其文之備也。經上文引周詩言民之父母者曰。凱以強教之。第以說安之。蓋於民說安之者。皆於民強教之也。君子強。則民亦強矣。此周人強民也。中庸曰。雖柔必強。強民之道也。窮如禮大傳四世服窮之窮。謂盡也。蓋至周而賞罰之道盡矣。易所以貴窮理也。異乎易窮則變者也。賞罰道盡。民

知勸戒。斯強民者立焉。

釋曰。鄭釋求備。大望者非也。殷求備於民者。豈貢稅重乎。魯語云。湯以寬治民。孟子善殷之助矣。則必非於貢稅存大望焉。論語云。周公曰。無求備於一人。蓋言用人也。且自一人言也。與此言天下民之治道者不同。夫天下民之治道。其能終不求備乎。殷道之進於夏道也。宜哉。呂氏云。殷人始瀆辭。若盤庚三篇也。非也。尙書大傳稱孔子言五誥。可以觀仁。盤庚之誥。其一也。其曲以喻之者。仁也。豈瀆乎。檀弓云。殷人作誓而民始畔。誓辭其瀆辭也。鄭釋強民者。失之矣。釋文。強其兩反。此鄭讀也。周官司諫云。正其行而強之道藝。鄭注云。強猶勸也。學記曰。強而弗抑則易。蓋鄭

亦皆讀強上聲。今攷學記釋文。強沈其良反。此沈重讀也。見釋文序錄。學記疏以堅強說焉。由是推之。司諫強亦當讀平聲。言強教之也。非強勸人也。釋詁云。驚務強也。郭注云。皆自勉強是也。如以強勸人爲言。豈立言之善乎。書康誥云。作新民。何患於周承殷敝乎。則易之易以智反。鄭釋窮者以繁文備設言之。非也。引易者說卦及繫辭傳文。

子曰。虞夏之道。寡怨於民。殷周之道。不勝其敝。

勝如字去聲

鄭氏曰。勝猶任也。殷周極文。民無恥而巧利。後世之政難復。

鄭讀勝平聲

謹案夏受虞禪。故言夏而稱虞夏焉。寡少也。言其道可少怨於民也。蓋虞夏之道。其終所失之敝少也。勝克也。言其

道不克其民之敝也。蓋殷周之道其終所失之敝多也。明乎世變不同也。非以疵其道焉。故下文於其質其文皆稱其至矣。禪音

釋曰。鄭注於義未析也。虞夏之道其初所尚之宜則無怨矣。禹貢云。祇台德先。不距朕行。又云。聲教訖于四海。豈寡怨已乎。孔疏言舜寡怨者無徵文也。論語言仁者非言寡怨矣。不曰在邦無怨乎。勝克釋詁文。

子曰。虞夏之質。殷周之文。至矣。虞夏之文。不勝其質。殷周之質。不勝其文。

鄭氏曰。言後有王者其作質文不能易之。王者相變。質文各有所多也。

謹案論語稱堯者曰煥乎其有文章。虞承堯而禪夏。此可知虞夏之質非無文也。而文不勝其質。故曰虞夏之質至矣。殷因夏之文而益焉。論語曰周監於二代。郁乎文哉。周監殷而亦監夏。此可知殷周之文非無質也。而質不勝其文。故曰殷周之文至矣。

釋曰。論語云殷因於夏禮。所損益可知也。表記言殷之文爲至。則知其於夏之文必益焉。漢書董仲舒傳云夏上忠。殷上敬。周上文。白虎通說同上。敬者尙質也。漢書杜欽傳云殷因於夏尙質。周因於殷尙文。此各自一端言之。雜以孝經緯元命包之說。故與表記說不皆同。勿以淆經矣。董子春秋繁露三代改制篇言夏文商質者。又與漢書本傳

不同。蓋非董子原書也。

子言之曰。後世雖有作者。虞帝弗可及也已矣。君天下。生無私。死不厚其子。子民如父母。有憐怛之愛。有忠利之教。親而尊。安而敬。威而愛。富而有禮。惠而能散。其君子尊仁畏義。恥費輕寶。忠而不犯。義而順。文而靜。寬而有辨。甫刑曰。德威惟威。德明惟明。非虞帝其孰能如此乎。

鄭氏曰。死不厚其子。言既不傳位。又無以豐饒於諸臣也。恥費。不爲辭費。出空言也。實謂財貨也。辨別也。猶寬而栗也。靜或爲情。德所威則人皆畏之。言服罪也。德所明則人皆尊寵之。言得人也。

謹案表記稱子言之者八。而此獨又加曰爲文。明其餘皆

然。互文也。作者謂後起之聖也。有惜世之愛仁也。有忠利之教。義也。易曰。利者義之和也。大學所謂不以利爲利。以義爲利也。左傳曰。上思利民。忠也。仁親而義尊。無親而不尊。尊而不親也。安如堯典安安之安。孟子所謂由仁義行。非行仁義也。今言性既安而又勉以敬焉。虞書稱舜之命曰。欽哉。欽敬也。威而愛。尊本乎親也。富而有禮。此制諸義。則爲仁之節也。惠而能散。此發諸仁。則爲義之分也。呂氏曰。富而有禮。故恥費。恐用之不以道也。畏義也。惠而能散。故輕實。貨不必藏於己也。尊仁也。其說明矣。易曰。翩翩不富。皆失實也。犯如論語而好犯上之犯。忠而不犯。親也。義而順。尊也。文而靜。仁也。寬而有辨。仁中義也。儒行曰。言談

者仁之文也。論語曰。仁者靜。易曰。井以辨義。皆君子德也。引書甫刑者。言舜德之威。人惟服其威。舜德之明。人惟化其明。其君天下者能如此。偏音

釋曰。禮運云。後聖有作。斯後起焉。若易繫辭傳言包犧氏沒。神農氏作也。引義和者。易乾文言文。引左傳者。桓六年文。釋詁云。欽敬也。鄭釋費爲辭費。於經病添文矣。貨不必藏於己。用禮運說也。引失實者。易泰象傳文。虞書稱舜命典樂者云。寬而栗。謂嚴栗也。蓋嚴以成寬。其有辨可知也。引辨義者。易繫辭傳文。經引甫刑。言虞舜之本文也。孔疏云。尚書以明堯德。記者斷章而爲義也。此疏說於僞孔傳爾。書異於詩。可斷章乎。書堯典云。克明俊德。書疏引鄭云。

俊德賢才兼人者。鄭以明揚爲說也。大學引文。俊作峻。鄭注云。峻大也。則以自明明德釋之。朱子大學說亦然。蓋大學固云。皆自明也。今此釋德明。惟明者例同。

子言之。事君先資其言。拜自獻其身。以成其信。是故君有資於其臣。臣有死於其言。故其受祿不誣。其受罪益寡。

鄭氏曰。資。謀也。獻。猶進也。言臣事君。必先謀定其言。乃後親進爲君言也。死於其言。竭力於其所言之事。死而不負也。於事不信曰誣。爲去聲

謹案立政稱周公曰。予旦已受人之微言。咸告孺子王矣。蓋先資其言也。遂拜獻焉。故立政曰。拜手稽首。告嗣天子王矣。不曰自獻其言。而曰自獻其身者。蓋行其言於其身。

也。故立政曰。迪知忱恂于九德之行。謂九德非徒信于其所言。而誠信于其所行也。蓋拜自獻其身也。卽以成其信

矣。

已音以。微許韋反。稽音啟。行皆平聲。忱音沈。恂音荀。

釋曰。鄭注善矣。宜有申焉。引立政者。周書文。釋詁云。微善也。又云。迪。道也。謀誠也。恂。信也。道與導通。謀與忱通。九德。卽虞書皋陶謨所稱者是也。蓋導其君知誠信于九德之行也。詳尚書集注述疏。釋詁云。咨。謀也。咨與資通。漢志引書伊訓云。誕資有牧。猶堯典。咨十有二牧也。孔疏略焉。或訓資爲藉。不如鄭義能以先該後也。

子曰。事君。大言入則望大利。小言入則望小利。故君子不以小言受大祿。不以大言受小祿。易曰。不家食吉。

鄭氏曰。大言可以立大事也。小言可以立小事也。入謂君受之利。祿賞也。入或爲人。大祿小祿。言臣受祿各用其德能也。易大畜彖辭。彖曰。不家食吉。養賢也。言君有大畜積。不與家食之而已。必以祿賢者。賢有大小。祿有多少。養如字

謹案利。如公羊傳稱利國家之利。言之大小。卽望其利國家者大小如之。馬氏謂以此望其庶幾是也。以用也。謂君子用人言者也。不用人言之小者受大祿。不用人言之大者受小祿。當各如其量焉。論語曰。君子不可小知而可大受也。小人不可大受而可小知也。亦自用人者明其不可也。經引易大畜彖辭者。彖傳固以養賢明之。則非賢者自爲量矣。君子量祿養賢。此賢者所由不家食也。幾平聲

釋曰。鄭注云。利祿賞也。非也。進言而惟望祿賞乎。引公羊傳者。莊十九年文。以用說文義也。經稱不以。非謂言者不以焉。事君者。小言而大祿。其不受也。宜矣。如大言而小祿。其不受也。嫌矣。其遽不受乎。君將以爲其不我足也。其姑受而後辭乎。則經言不受者。於義未悉也。古之君子。可大受而反小知者。屈身下僚。亦不得志者之適然也。而君子用人者。奚令其倒置若是邪。鄭說君不家食。於文未洽也。子曰。事君不下達。不尙辭。非其人弗自。小雅曰。靖共爾位。正直是與。神之聽之。式穀以女。共音恭。女古通汝。

鄭氏曰。不下達。不以私事自通於君也。不尙辭。不多出浮華之言也。弗自。不身與相親也。靖。治也。爾。女也。式。用也。穀。

也言苟治女位之職事。正直之人。乃與爲倫友。神聽女之所爲。用祿與女。

謹案下達者。若漢文帝謂卑之無甚高論也。論語曰。小人下達。呂氏謂以下達事君。賊其君者也。不尙。猶不貴也。辭謂虛辭。明乎尙實事也。自由也。陳氏謂所由以進者。是也。若商鞅。因秦寵臣景監以求見孝公。則所由非其人矣。小雅詩。小明篇。靖毛傳。謂謀也。共。古通恭。敬也。穀。善也。謀敬爾職。而與正直之人。皆實事之善也。非善爲辭而已。神其聽焉。其用善必以女也。鞅於兩反。監去聲。

釋曰。鄭注云。不下達。不以私事自通於君也。夫私事者。非公事也。孔疏以私事爲小事焉。非也。周官小宰言六官之

屬者。皆曰。大事則從其長。小事則專達。其又何說乎。且鄭說於文未適也。儀禮士昏禮云。昏禮下達。鄭注云。達。通達也。下通其言。鄭以爲自上而下達也。今於表記釋下達者。乃相反乎。長丁丈反。引文帝者。見漢書張釋之傳。孟子云。我非堯舜之道。不敢以陳於王前。故曰。責難於君。謂之恭。吾君不能謂之賊。經引詩者。固言靖共也。共與恭通。鄭注以不多釋不尙。若論語所謂君子不多也。惟學者以不多出連讀焉。則誤矣。釋詁云。由自也。今轉注之。鄭注略焉。則汎矣。元陳氏澹說宜從也。引商鞅者。見史記商君列傳。釋詁云。靖。治也。又云。靖。謀也。恭。敬也。鄭釋靖共者。倒之。於經未叶也。式用。釋言文。釋言云。穀。祿也。釋詁云。穀。善也。

子曰。事君遠而諫則調也。近而不諫則尸利也。調與諂通

鄭氏曰。尸謂不知人事無辭讓也。

謹案調。陷也。釋文調亦作諂。說文諂諛也。徐氏曰。諂陷也。今以此經參之。諛言將陷人。諫言將陷己。蓋文同義異也。表記篇中。信巧亦異利巧也。事君遠而諫其或危焉。則陷也。白虎通所以言陷諫也。或曰。穎考叔以穎谷封人而諫鄭莊公焉。遠而諫矣。而君從之。何也。夫左傳言其諫所因者。則云。有獻於公。公賜之食。蓋反遠而爲近也。此其善諫也。尸主也。事君近而不諫。其忘義焉。則主利也。穎余頃反釋曰。申說文釋諂者。南唐徐氏鍇說也。諂從名。象人在臼上。將陷焉。己與人皆人象也。諂者調之省文。襄三年左傳

注云。諂媚也。今攷媚有文同義異者。論語云。與其媚於奧。寧媚於竈。此非詩毛傳所謂以道媚者也。詩大雅云。藹藹王多吉士。維君子使。媚于天子。藹藹王多吉人。維君子命。媚于庶人。此所謂以道媚者也。詳論語集注述疏顏淵問爲邦章。鄭於表記無釋調焉。鄭玉藻注云。調爲傾身以自下也。蓋傾與陷乃相因之義矣。孔疏云。若與君疏遠。強欲諫諍。則是調佞之人。望欲自達也。今以古制攷之。孔疏豈其然乎。襄十四年左傳云。夏書曰。道人以木鐸徇于路。官師相規。工執藝事以諫。正月孟春。於是乎有之。諫失常也。蓋正月卽始令焉。孔疏以爲孟春上下皆諫。其常時不得皆諫也。非也。周語云。百工諫。近臣盡規。豈必孟春云乎。古

制無人不得諫。其諫安有時乎。引穎考叔者。隱元年左傳文。尸主。詩采蘋毛傳義也。鄭於表記釋尸者。異乎詩大雅言善人載尸者矣。斯非儼於其倫也。

子曰。邇臣守和。宰正百官。大臣慮四方。

鄭氏曰。邇。近也。和。謂調和君事者也。齊景公曰。唯據與我和。宰。冢宰也。冢宰。主治百官。

謹案左傳曰。和如羹焉。水火醯醢鹽梅。濟其不及。以洩其過。蓋晏子以明事君者。獻可替否之和也。此近臣所宜守也。醯。馨夷反。醢。音海洩。息列反。

釋曰。邇。訓近。說文同。引左傳者。昭二十年文。蓋晏子對齊景公之言也。左傳云。公曰。惟據與我和夫。晏子對曰。據亦

同也。焉得爲和。此言梁丘據失邇臣之守也。今鄭注所引者。消矣。夫讀若乎。

子曰。事君欲諫不欲陳。詩云。心乎愛矣。瑕不謂矣。中心藏之。何日忘之。

鄭氏曰。陳謂言其過於外也。瑕之言胡也。謂猶告也。

謹案詩小雅鵲巢篇。取毛詩作遐。如孝經所引者然。朱子曰。遐何通。是也。蓋義與瑕同。古字音同假借焉。愛謂愛君。孝經說藏者藏此愛也。或曰。商書言西伯戡黎。祖伊告紂而諫之。反而有言。何也。此亡國之罪。不得已也。故經不曰不得已。而曰不欲陳。明其有不得已也。

隱音習
戡音堪

釋曰。鄭釋陳者。無可易也。或曰。陳謂直諫。蓋諷諫者不陳。

諫也。非也。如不能諷諫者。終不欲陳乎。竟取不謂矣乎。白
虎通謂孔子獨從諷諫者。誣也。今經統言曰欲諫。亦豈言
欲諷諫乎。詳尚書集注述疏。逸文伊訓篇。朱子詩傳采鄭
禮注釋。隰桑者焉。胡猶何也。孔疏云。王肅以爲藏善。鄭亦
然。皇氏以爲藏惡。不欲嚮人陳之。皇氏者侃也。疏以皇說
爲非。蓋藏惡則不當言不忘也。然藏善則所諫者云何。惟
孝經說言藏愛者。叶矣。鄭禮注原無釋藏。孔謂鄭亦然者。
何邪。

子曰。事君難進而易退。則位有序。易進而難退。則亂也。故君子
三揖而進。一辭而退。以遠亂也。易以智反。遠去聲。

鄭氏曰。亂謂賢否不別。進難者爲主人之擇己也。退速者。

爲君子之倦也。爲去聲

謹案禮說曰。進以禮。故難。退以義。故易。是也。位有序者。進位。退位。皆不亂也。其亂者。進不以禮。退不以義也。夫難進而易退。賓主行禮間。且有然矣。君臣尤可知也。故曰遠亂焉。

釋曰。鄭義未深也。以斯而難易焉。則凡人爾。

子曰。事君。三違而不出竟。則利祿也。人雖曰不要。吾弗信也。竟。古通。境。要。平聲。

鄭氏曰。違。猶去也。利祿。言爲貪祿畱也。臣以道去君。至於三而不遂去。是貪祿。必以其強與君要也。爲去聲。強平聲。

謹案公羊傳曰。古者大夫已去。三年待放。蓋去位而待於

國竟也。若三違則遂去國矣。孟子無官守無言責其去齊也。以王不從其言而改之也。其去猶以出晝而決焉。

釋曰。引公羊傳者。宣元年文。放者。縱之去國也。晝。齊邑名。子曰。事君。慎始而敬終。

鄭氏曰。輕交易絕。君子所恥。

易以智反

謹案左傳引書曰。慎始而敬終。終以不困。蓋於事君者言矣。今表記不明引書文。而其義亦然。易所謂言有物也。猶論語孔子概述言之例也。

釋曰。左傳引書者。見襄二十五年。杜注云。逸書。引易者。家人象傳文。

子曰。事君可貴可賤。可富可貧。可生可殺。而不可使爲亂。

鄭氏曰。亂。謂違廢事君之禮。

謹案周官大宰言八柄馭羣臣者曰。爵以馭其貴。祿以馭其富。奪以馭其貧。又曰。生以馭其福。蓋言貧則該賤。言生則有殺可知也。故內史言八柄之灋。五曰殺。六曰生。互相備焉。今表記統言之。事君可貴可富可生者。其才其德皆有成。故可也。事君可賤可貧可殺者。其志其節終不變。故可也。若此者。其可使爲亂乎。必不可也。大音泰。馭音御。灋古法字。釋曰。周官大宰注云。生猶養也。賢臣之老者。王有以養之。成王封伯禽於魯。曰。生以養周公。死以爲周公後。是也。彼注据文十三年公羊傳也。若夫死非其罪。將殺而得免者。亦云生也。猶養養之。讀養如字。養周公讀養去聲。

子曰事君軍旅不辟難朝廷不辭賤處其位而不履其事則亂也。故君使其臣得志則慎慮而從之。否則孰慮而從之。終事而退。臣之厚也。易曰不事王侯高尙其事。

辟音避難去聲處上聲孰古通熟

鄭氏曰軍旅不辟難朝廷不辭賤言尙忠且謙也。履猶行也。使謂使之聘問師役之屬。慎慮而從之者。此已志也。欲其必有成也。否謂非已志也。孰慮而從之。又計於已利害也。終事而退。非已志者事成則去也。事或爲身不事王侯。言臣致仕而去。不復事君也。君猶高尙其所爲之事。言尊大其成功也。

謹案從之謂從事。孰古熟字。蓋不得志則熟思其權宜而從事也。易蠱上九爻辭。上九者蠱事之終。退而無位也。則

自得其志事焉。故象傳說之曰。志可則也。

蓋音古

釋曰。鄭注言計己利害者。豈精義之言歟。鄭釋易以爲君高尚之者。非也。

子曰。唯天子受命于天。士受命于君。故君命順則臣有順命。君命逆則臣有逆命。詩曰。鵲之姜姜。鵲之賁賁。人之無良。我以爲君。鵲士倫反。賁音奔。

鄭氏曰。言皆有所受。不敢專也。唯當爲雖。字之誤也。臣受順則行順。受逆則行逆。如其所受於君。則爲君不易矣。姜姜賁賁。爭鬪惡貌也。良善也。言我以惡人爲君。亦使我惡。如大鳥姜姜於上。小鳥賁賁於下。

易以智反

謹案唯與惟通。士統諸臣而言。卿大夫皆由士始也。曲禮

曰列國之大夫入天子之國曰某士。此可推矣。穀梁傳曰：人之於天也，以道受命於人也；以言受命，不若於道者，天絕之也；不若於言者，人絕之也。臣子大受命，蓋若者順也，順天命以爲君命，故臣子之受命莫大焉。其反是而逆者，則異矣。明乎爲君宜慎也。此猶論語於齊景公言君不君，臣不臣也。猶孟子於齊宣王言君視臣，臣視君也。詩：鄰風鵲之賁賁篇。詩序曰：刺衛宣姜也。毛傳曰：君國小君。鄰音庸釋曰：引穀梁傳者，莊元年文。釋言云：若順也。鄭注之義，得古義焉。於經言受命之故者，叶矣。或曰：大戴禮衛將軍文子篇稱晏子之言曰：有道順君，無道衡命。衡，古橫字。蓋臣有逆命也，以匡君也。如其說，是不受命也。何以申經言受

命之故乎。且戒君之義。豈不當如鄭說乎。奚爲以忌諱而棄之乎。姜姜毛詩作疆疆。賁賁毛詩作奔奔。經第七子言之。於此節以前。皆言臣之事君。於此節以後。皆統君臣而言。其類也。或疑此節下脫子言之。非也。

子曰。君子不以辭盡人。故天下有道。則行有枝葉。天下無道。則辭有枝葉。是故君子於有喪者之側。不能賻焉。則不問其所費。於有病者之側。不能饋焉。則不問其所欲。有客不能館。則不問其所舍。故君子之接如水。小人之接如醴。君子淡以成。小人甘以壞。小雅曰。盜言孔甘。亂是用餽。行去聲賻音附餽音談

鄭氏曰。不見人之言語。則以爲善。謂其餘行或時惡也。行有枝葉。所以益德也。言有枝葉。是衆虛華也。枝葉依榦而

生言行亦由禮出。不問者皆避有言而無其實。水相得合而已。酒醴相得則敗。淡無酸酢少味也。接或爲交。盜賊也。孔甚也。飲進也。酇古醋字七故反

謹案有枝葉者。茂之謂也。有道時人茂於實行。無道時人茂於虛言。小雅詩巧言篇。

釋曰。昭七年左傳云。禮人之榦也。蓋其榦所生者。能行禮焉。斯美行有枝葉也。禮云禮云而已。惟美言有枝葉爾。孔疏申鄭者。於義未析也。酇古醋字。說文家。今惟以此爲酇酢字。相承之變也。鄭釋淡者。以爲無酸酢些少味。何也。蓋以醴敗爲酸酢故也。孔甚。釋言文。飲進。毛傳義也。

子曰。君子不以口譽人。則民作忠。故君子問人之寒。則衣之。問

人之饑則食之。稱人之美則爵之。國風曰。心之憂矣。於我歸說。

譽音餘衣去聲。食音嗣。說古通稅。

鄭氏曰。譽繩也。衣之食之爵之者。皆爲有言不可以無實。

引詩者。欲歸其所說忠信之人也。爲去聲。鄭讀說如字。

謹案國風詩曹風蜉蝣篇。說舍也。陳氏曰。其於我歸舍乎。

是也。蓋憂其所舍而館之。不以口譽人也。蜉音浮。蝣音由。

釋曰。莊十四年左傳云。蔡侯繩息嬀。蓋譽之也。或曰。物之

可爲譽者。必從繩正也。說文作繩。詩蜉蝣釋文。有讀說如

字者。鄭禮注讀同。禮釋文消矣。鄭意以經所說君子。卽所

說忠信之人也。此於文未適也。說舍。詩甘棠毛傳義也。

子曰。口惠而實不至。怨藩及其身。是故君子與其有諾責也。寧

有已怨國風曰言笑晏晏信誓旦旦不思其反反是不思亦已焉哉。

音以

鄭氏曰善言而無信人所惡也已謂不許也言諾而不與其怨大於不許也詩言相與爲昏禮而不終言始會合言笑和悅要誓甚信今不思其本恩之反覆反覆之不思亦已焉哉無如此人何怨之深也。

覆反

謹案國風詩衛風氓篇爾雅曰晏晏柔也詩說曰旦旦明也王風曰謂予不信有如皦日反復也朱子稱左傳曰思其終也思其復也思其反之謂也禮說曰表記今謂復言矣復言之不思亦何如其先已焉哉明寧有已怨也。

歟古反

釋曰引爾雅者釋訓文釋詁云柔安也釋訓云晏晏旦旦。

悔爽忒也。爾雅釋文曰。本或作忌。鄭注酌焉。詩王風毛傳云。皦白也。易彖傳云。復亨。剛反。然則反者復也。亦已焉哉。已之爲文。應上文也。非語辭。禮說云。僖十五。年左傳。晉侯許賂秦伯。以河外列城五。旣而不與。此怨菑所由及也。

子曰。君子不以色親人。情疏而貌親。在小人則穿窬之盜也。與。

窬音踰
與平聲

謹案鄭注於此無說焉。禮說曰。色者外貌。情者內心。是也。穿穿穴。窬踰踏。此盜之乘人不覺而爲竊者。故情惡而貌善。雖善其色。常畏人知其情。彼以色親人者。亦猶此也。釋曰。論語穿窬。釋文本作穿踰。蓋窬者踰之假借也。今釋此者。用孟子朱注也。或曰。穿屋窬。然盜者豈止此邪。

子曰。情欲信。辭欲巧。

鄭氏曰。巧謂順而說也。

說音悅

謹案情欲信而辭欲巧者。此巧之本於信也。非巧之本於僞也。僞巧則如經上文所謂利而巧也。皋陶謨曰。何畏乎巧言令色孔壬。蓋巧言而令色。是甚伎也。故論語明之曰。鮮矣仁。此其僞莫甚焉。今信巧與僞巧不同。猶仁術智術與詐術不同也。大戴禮曾子事父母篇所以貴孝子巧變也。左傳叔向所以引詩巧言如流而稱君子也。論語曰。辭達而已矣。聘禮記曰。辭無常。孫而說。辭多則史。少則不達。辭苟足以達。義之至也。非信而巧者矣。達乎。

孫音遜說音悅

釋曰。釋言云。孔甚也。釋詁云。王伎也。論語云。巧言亂德。亦

明其亂信也。孟子言仁術。又言術知。而諸史多言智術詐術焉。知與智通。鄭注言順而說者。聘禮記之義也。彼注云。孫順也。論語言爲命者。辭命也。既討論而修飾矣。遂潤色焉。蓋欲其信而巧也。攷工記云。雜四時五色之位以章之。謂之巧。則辭章亦巧矣。詩兩無正云。巧言如流。俾躬處休。此異於詩上文所謂辟言也。毛傳云。辟法也。鄭箋云。巧猶善也。謂以事類風切之言。昭八年左傳稱叔向引此詩。巧言以美師曠諫晉侯者。謂爲君子之言。豈斷章取義云乎。蓋叔向君子也。而不斥巧言。則巧言當別有義也。豈不以辭有信巧者乎。詩烝民云。令儀令色。小心翼翼。言仲山甫之德也。此其令色本於小心也。辟必益反。風讀去聲。

子言之。昔三代明王。皆事天地之神明。無非卜筮之用。不敢以其私褻事上帝。是故不犯日月。不違卜筮。卜筮不相襲也。

鄭氏曰。神明。謂羣神也。無非卜筮之用。言動任卜筮也。曰月。謂冬至正月。及四時也。所不違者。日與牲尸也。襲。因也。大事則卜。小事則筮。

謹案曲禮曰。龜爲卜。筮爲筮。又曰。卜筮不過三。卜筮不相襲。蓋襲者。謂三人占皆吉皆凶也。襲與習通。重也。書金縢曰。乃卜三龜。一習吉。此周公三卜。而一皆重吉。不復三筮。是不相襲也。由是推之。則三筮皆吉皆凶。亦不復三卜矣。鴻範曰。龜從筮逆。由不相襲而然也。重平聲

釋曰。禮說云。冬至祭圓丘南郊也。夏至祭方澤北郊也。周

官可攷焉。史記封禪書云。周官曰。冬日至。祀天於南郊。迎長日之至。夏日至。祭地祇。蓋史遷約周官說也。正月正朔也。四時迎氣。月令詳矣。此皆言日月之不卜者也。故經云。不犯。謂不以他事犯之也。如鄭表記此注文。其說亦同。則非誤者。惟鄭釋周官圜丘方澤以異說而失之矣。漢志稱書武成者。蓋與僞古文不同。其曰。辛亥。祀于天位。此武王克殷祀天之日也。故周制以祈穀大雩而卜郊者。皆用车焉。今孔疏因春秋言卜郊者。以爲圜丘方澤迎氣之事皆卜也。豈其然乎。周官大宰云。祀五帝。帥執事而卜曰。此因事爲之。非常祭也。鄭釋不違者。以卜曰卜牲。卜尸推之。明矣。易彖傳云。習坎。重險也。蓋習者重也。書金縢說。習與襲

通重襲則相因矣。鄭注酌焉。筮與簪通。周官籒人云。凡國之大事。先筮而後卜。此言其常法爾。周公之卜。固未筮也。僖二十五年左傳言。晉將勤王者。則先卜而後筮矣。而其占皆果吉。安可議其違禮邪。筮。易作策。蓍策也。詳論語集注。述疏子適。衛章易說。禪讀若擅。祇讀若其。

大事有時日。小事無時日。有筮。外事用剛日。內事用柔日。不違龜筮。

鄭氏曰。大事有事於大神。有常時常日也。有事於小神。無常時常日。臨有事筮之。剛日柔日。順陰陽也。陽爲外。陰爲內。事之外內。別乎四郊。

謹案此申上文卜筮之用。大事有時日而卜者。若卜郊卜

祿是也。禮說曰：十日有五奇五偶。甲、丙、戊、庚、壬，五奇爲剛也。乙、丁、己、辛、癸，五偶爲柔也。其爲外事、內事之用者，謂常事也。如非常事焉。漢志稱書武成曰：庚戌，武王燎于周廟。又曰：辛亥，祀于天位。書召誥曰：丁巳，用牲于郊。洛誥曰：戊辰，王在新邑，烝祭歲，皆非常祭也。其日皆非剛柔常例也。記曰：郊之用辛也。此卜郊從武成故也。記曰：社祭土而主陰氣也。日用甲，用日之始也。其日亦皆非剛柔常例也。今之擇日，從日者家言，與古之卜日，筮日雖不同，其敬事之意無不同。

奇幾平聲 戊音茂 己音紀 戌音恤 燎力召反 巳音祀

釋曰：鄭注云：事之外內，別乎四郊。謂自四郊而別外內也。郊祭外事也。社祭廟祭內事也。孔疏申鄭者，不辯乎常事。

與非常而強別之。則窒矣。引記者禮郊特牲文。十日爲十干。其所配者。若辛配亥等。則十二支也。

子曰。牲牷禮樂齊盛。是以無害乎鬼神。無怨乎百姓。牲音全。齊音菜。盛音平。

鄭氏曰。牷。猶純也。

謹案左傳曰。禮不卜常祀。而卜其牲日。明乎卜牲在先也。春秋曰。宣公三年春。王正月。郊牛之口傷。改卜牛。牛死。乃不郊。明乎卜牲不牷。則不祭。而禮樂齊盛皆廢也。今既卜牲牷。乃備禮樂而及齊盛。則鬼神饗百姓安矣。故幽無害明。無怨焉。

釋曰。此惟卜牲爾。孔疏於此云。皆不違龜筮。此於義未析。

也。引左傳者。傳三十一年文。易彖傳云。鬼神害盈而福謙。今表記以無害言矣。釋文。齊亦作齋。

子曰。后稷之祀。易富也。其辭恭。其欲儉。其祿及子孫。詩曰。后稷兆祀。庶無罪悔。以迄于今。易以智反。迄。詩訛反。

鄭氏曰。富之言備也。以傳世之祿。共儉者之祭。易備也。兆。四郊之祭處也。迄。至也。言祀后稷於郊。以配天。庶幾其無罪悔乎。福祿傳世。乃至於今。共與俱通。幾平聲。

謹案詩大雅生民篇。兆。毛詩作肇。始也。兆亦訓始。猶孟子言爲之兆也。詩上文曰。卽有邠家室。邠者后稷所受封國也。朱子曰。稷始受國爲祭主。故曰肇祀是也。蓋自后稷之始祀。庶幾無罪悔。以至於今矣。言今子孫當尊后稷以配

天也。故溯言后稷之始祀焉。郊特牲曰。富也者。福也。又曰。以祭則受福。今詩言后稷始受國爲祭主者。其以庶幾爲辭。則恭矣。其后稷之功。而自斂不多也。惟欲無罪悔。則儉矣。其食舊德之祿。至於今。則及子孫矣。蓋后稷之祭。易福也。詩周頌曰。降福孔夷。毛傳曰。夷。易也。詩疏曰。有德故易福。

福。邵音台。

釋曰。肇始。釋詁文。鄭注。以兆祀爲后稷郊祭天者。非也。詩生民。鄭箋。以稷爲二王之後。得郊祭天也。此惑於緯云爾。周官小宗伯云。兆五帝於四郊。以言此經。非也。迄至。釋詁文。詩生民。言姜嫄生后稷者。不稱帝嚳焉。孔疏云。后稷。帝嚳之子。蓋未辯之矣。詳論語集注述疏。禘灌章。堯曰。章。釋

詁云于於也。

子曰。大人之器威敬。天子無筮。諸侯有守筮。天子道以筮。諸侯非其國不以筮。卜宅寢室。天子不卜處大廟。

處上聲大音泰

鄭氏曰。威敬言其用之尊嚴。天子無筮。謂征伐出師若巡守也。天子至尊。大事皆用卜也。春秋傳曰。先王卜征五年。歲襲其祥。守筮守國之筮。國有事則用之。道以筮者。始將出卜之。道有小事則用筮。諸侯入他國則不筮。不敢問吉凶於人之國也。諸侯受封于天子。因國而國。唯宮室欲改易者得卜之耳。天子不卜處大廟。言卜可建國之處吉。則宮廟吉可知。

巡守之守音符

謹案大人。謂天子諸侯也。禮運曰。大人世及以爲禮。易乾

九五曰。飛龍在天。利見大人。天子象也。易革九五曰。大人虎變。諸侯象也。亦天子象也。此所以言湯武革命也。器。卜筮之器。蓍龜也。易傳曰。形而上者謂之道。形而下者謂之器。禮器曰。龜爲前列。先知也。左傳言居蔡者曰。作虛器。則蓍之爲器可推矣。威畏也。處大廟者。若月令天子居大廟也。蓍音尸。

釋曰。孔疏云。大人謂天子。其不及諸侯。非也。引春秋傳者。襄十三年左傳文。釋言云。征行也。今謂巡守。若管仲言昭王南征也。堯典云。五載一巡守。此常制也。豈卜而乃行乎。蓋鄭使者爲楚執之久。聊以遠古難稽之言而諷楚也。以爲可待他年爾。不然。何以不於周制十有二歲巡守而言。

卜乎。鄭其未審乎。禮祭義云。虞夏殷周。天下之盛王也。故古帝亦以先王稱焉。詳孝經集注述疏。引虛器者。文二年左傳文。史記錄鴻範。威作畏。蓋其訓義通也。鄭注。宮廟。或作宗廟。非也。大廟亦稱宮。月令大廟。則明堂也。非宗廟也。大戴禮盛德篇言明堂曰。其宮方三百步。白虎通所以稱布政之宮也。或曰。禮雜記云。大夫卜宅與葬日。此孝經所謂卜其宅兆也。則諸侯卜宅可知也。然先言宅兆。其非立文之序歟。或曰。釋言云。宅居也。然宅居非惟寢室已也。孔疏云。宅及寢室。當矣。

子曰。君子敬則用祭器。是以不廢日月。不違龜筮。以敬事其君長。是以上不瀆於民。下不褻於上。長丁丈反

鄭氏曰。敬則用祭器。謂朝聘待賓客。崇敬不敢用燕器也。不廢日月。不違龜筮。用龜筮問所貢獻也。上之於下以直。則下應之以正。不褻慢也。

謹案表記稱子言之者八。禮說曰。始子言之。言敬也。終子言之。亦言敬也。明乎以敬統君子之事焉。是也。論語曰。子路問君子。子曰。脩己以敬。曰。如斯而已乎。曰。脩己以安人。曰。如斯而已乎。曰。脩己以安百姓。脩己以安百姓。堯舜其猶病諸。今表記言君子者。皆脩己以安人。安百姓者也。皆以敬成仁也。此表記所以爲萬世人之表也。

釋曰。孔疏申鄭者。謂問貢獻之物。非也。此於禮無徵也。鄭依經文。謂用龜筮問所貢獻之日月也。猶經上文言擇日。

月以見君也。襄九年左傳云。君冠必以裸享之禮行之。孔疏謂此亦用祭器也。冠讀去聲。

禮記子思子言鄭注補正卷二終

門弟子校茱於讀書堂